

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին թիվ 2316474272 և 2316440405 որոշումները բեկանելու և վարչական իրավախախտումների վերաբերյալ գործերի վարույթները կարճելու մասին

<< 16 >> 06 2023թ. 7-13- 6172

ք.Երևան

Ճանապարհային ոստիկանության պետ, ոստիկանության գնդապետ Ն.Սարգսյանս, վերանայելով Արամ Կոնջորյանի ՄԴ/42155-23 դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Կոտայքի մարզի Չարենցավան քաղաքի 5-րդ թաղամասի 1-ին շենքի 12-րդ բնակարանի բնակիչ Արամ Կոնջորյանը դիմումով խնդրել է անվավեր ճանաչել Ճանապարհային ոստիկանության վարչական տույժ նշանակելու մասին թիվ 2316474272 և 2316440405 որոշումները՝ նշելով, որ նույն իրավախախտումների համար կայացվել են նաև համապատասխանաբար Ճանապարհային ոստիկանության վարչական տույժ նշանակելու մասին թիվ 2316439424 և Պարեկային ծառայության վարչական իրավախախտման վերաբերյալ գործով 8300583865 որոշումները:

Դիմումի քննարկման արդյունքում պարզվել է, որ Ճանապարհային ոստիկանության վարչական տույժ նշանակելու մասին թիվ 2316474272 և 2316440405 որոշումները ենթակա են բեկանման հետևյալ պատճառաբանությամբ.

<<Վարչարարության հիմունքների և վարչական վարույթի մասին>> օրենքի 37-րդ հոդվածի 1-ին մասի համաձայն՝ վարչական մարմինը պարտավոր է ապահովել փաստական հանգամանքների բազմակողմանի, լրիվ և օբյեկտիվ քննարկումը՝ բացահայտելով գործի բոլոր, այդ թվում՝ վարույթի մասնակիցների օգտին առկա հանգամանքները:

<<Տեսանկարահանող կամ լուսանկարահանող սարքերով հայտնաբերված ճանապարհային երթևեկության կանոնների խախտումների վերաբերյալ գործերով իրականացվող վարչական վարույթի առանձնահատկությունների մասին>> օրենքի 3-րդ հոդվածի 1-ին մասի համաձայն՝ վարչական վարույթի իրավախախտման հատկանիշների պարզման փուլում իրավախախտումը հիմնավորող ապացույցը իրավախախտումն ամրագրած **տեսանյութն է կամ լուսանկարը**, որը պարունակում է նաև տեխնիկական միջոցով արձանագրված տվյալները: Ըստ նույն հոդվածի 2-րդ մասի՝ որպես իրավախախտումը հիմնավորող ապացույց վարչական կամ դատական կարգով բողոքարկման վարույթում կարող են օգտագործվել Վարչական իրավախախտումների վերաբերյալ Հայաստանի Հանրապետության օրենսգրքի 251-րդ հոդվածով նախատեսված ապացույցները:

Նույն օրենքի 1-ին հոդվածի 2-րդ մասի համաձայն՝ սույն օրենքի գործողությունը չի տարածվում, երբ ճանապարհային երթևեկության կանոնի խախտումը հայտնաբերվել է ոստիկանության ծառայողի կողմից, և տրանսպորտային միջոցը օրենքով սահմանված կարգով կանգնեցվել է՝ անկախ խախտումը տեխնիկական միջոցով ամրագրված լինելու հանգամանքից:

Ճանապարհային ոստիկանության վարչական տույժ նշանակելու մասին 22.05.2023թ. թիվ 2316439424 որոշման հիմքում դրված տեսանյութը համադրելով 26.05.2023թ. թիվ 2316474272 որոշման հիմքում դրված տեսանյութի հետ պարզվել է, որ այդ որոշումները կայացվել են նույն իրավախախտման համար:

Այսպիսով, ակնհայտ է, որ նույն իրավախախտման համար կայացվել է երկու որոշում, ուստի 26.05.2023թ. թիվ 2316474272 որոշումը ենթակա է բեկանման, քանի որ այն տեխնիկական վրիպակի արդյունք է:

Երթևեկության նկատմամբ հսկողություն իրականացնելու նպատակով տեղադրված տեխնիկական սարքերի միջոցով հայտնաբերվել և Ճանապարհային ոստիկանության վարչական տույժ նշանակելու մասին 22.05.2023թ. թիվ 2316440405 որոշմամբ ամրագրվել է <<NISSAN>> մակնիշի 6400777 հաշվառման համարանիշի ավտոմոբիլի վարորդի կողմից 11.05.2023թ-ին ժամը 12:51-ին Երևան քաղաքի Աբովյան - Թումանյան փողոցների խաչմերուկի հատվածում կանգառ կատարելու կանոնները խախտելու փաստը: Նույն օրը տվյալ իրավախախտման համար վերը նշված տրանսպորտային միջոցը տարհանվել է ՀՀ ՆԳՆ ոստիկանության Երևան քաղաքի գնդի պահպանվող հատուկ տարածք, որտեղ իրավախախտումը ժամը 15:24-ի սահմաններում արձանագրվել է ՀՀ ՆԳՆ ոստիկանության Պարեկային ծառայության Երևան քաղաքի գնդի ծառայողի կողմից, որի 11.05.2023թ. թիվ 8300583865 որոշմամբ վարորդը ենթարկվել է վարչական պատասխանատվության:

Այսպիսով, ակնհայտ է, որ Ճանապարհային ոստիկանության վարչական տույժ նշանակելու մասին 22.05.2023թ. թիվ 2316440405 և Պարեկային ծառայության վարչական իրավախախտման վերաբերյալ գործով 11.05.2023թ. թիվ 8300583865 որոշումներով վարչական պատասխանատվության է ենթարկվել միևնույն արարքի համար, ուստի Ճանապարհային ոստիկանության վարչական տույժ նշանակելու մասին 22.05.2023թ. թիվ 2316440405 որոշումը ենթակա է բեկանման:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 247-րդ հոդվածի 1-ին մասի 8-րդ կետով և 293-րդ հոդվածի 1-ին մասի 3-րդ կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին թիվ 2316474272 և 2316440405 որոշումները բեկանել և վարչական իրավախախտումների վերաբերյալ գործերի վարույթները կարճել:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ Վարչական դատարան օրենքով սահմանված կարգով և ժամկետներում:
3. Սույն որոշման օրինակն ուղարկել Արամ Կոնջորյանին:



Ն. Սարգսյան